



Broj/Број: **01/2a-50-1-2-56/09**
Sarajevo/Сарајево, 7.12.2009.

ZAPISNIK
56. sjednice Komisije za vanjske poslove
Predstavničkog doma Parlamentarne skupštine BiH,
održane 7.12.2009.

Sjednica Komisije počela je u 12 sati. Sjednici su prisustvovali: Slavko Matić, Azra Hadžiahmetović, Husein Nanić, Azra Alajbegović, Denis Bećirović i Sefer Halilović.

Osim članova Komisije, sjednici je prisustvovala i Saliha Đuderija iz Ministarstva za ljudska prava i izbjeglice BiH.

Zapisnik je vodio Miroslav Stanišić, stručni saradnik u Komisiji za vanjske poslove.

Sjednicom je predsjedavao Slavko Matić, predsjedavajući Komisije, koji je prisutne upoznao s dnevnim redom 56. sjednice.

Članovi Komisije su za 56. sjednicu Komisije jednoglasno usvojili sljedeći

DNEVNI RED

1. Davanje mišljenja o saglasnosti za ratifikaciju:
 - a) Konvencije Ujedinjenih naroda o pravima lica s invaliditetom i Opcionalnog protokola (resorno ministarstvo: Ministarstvo za ljudska prava i izbjeglice BiH),
2. Tekuća pitanja.

Ad. 1. a) Davanje mišljenja o saglasnosti za ratifikaciju Konvencije Ujedinjenih naroda o pravima lica s invaliditetom i Opcionalnog protokola

Saliha Đuderija iz Ministarstva za ljudska prava i izbjeglice BiH rekla je da je Konvencija bila spremna za potpisivanje 30.3.2007. Nakon toga je Ministarstvo za ljudska prava i izbjeglice BiH pripremilo inicijativu koju je uputilo Vijeću ministara BiH, a ono je zadužilo Ministarstvo za ljudska prava i izbjeglice da pripremi osnov u skladu s procedurom. Ministarstvo je zatražilo mišljenja entitetskih vlada, koja su i dostavljena, nakon čega je uslijedila priprema osnova i upućivanje Konvencije Predsjedništvu BiH. Zatim je Predsjedništvo ovlastilo ministra za ljudska prava i izbjeglice BiH Safeta Halilovića da potpiše Konvenciju Ujedinjenih naroda o pravima lica s invaliditetom i Opcionalni protokol. Konvencija je potpisana 29.7.2008., nakon čega je Ministarstvo za ljudska prava i izbjeglice BiH počelo proceduru prevođenja i ovjeravanja kod sudskih tumača, a 22.10. 2008. godine prosljedilo dodatni dokument kako bi Ministarstvo vanjskih poslova BiH moglo završiti proces ratifikacije.

Sefer Halilović upitao je da li se usvajanjem ove konvencije ukidaju razlike između ratnih i neratnih invalida i kako je moguće da u Federaciji Bosne i Hercegovine ima mnogo više invalida nego u Republici Srpskoj i susjednim zemljama?

Saliha Đuderija kazala je da država, nakon što ratificira ovu konvenciju, ima obavezu da uskladi propise o utvrđivanju invaliditeta, a prava ratnih invalida bit će regulirana drugim zakonima. Što se tiče broja invalida, stepen invalidnosti trebalo bi utvrđivati na osnovu nedostataka u pogledu zdravstvenih problema, a u Federaciji BiH je utvrđivana invalidnost licima koja su radno nesposobna. Ne može se utvrđivati zdravstvena sposobnost licu starijem od 65 godina, koje je svakako radno nesposobno, i dodjeljivati mu ta prava, a upravo je to rađeno u Federaciji BiH.

Azra Hadžiahmetović dodala je da također ima i fiktivnog prijavljivanja prebivališta iz jednog entiteta u drugi zbog ogromne razlike u primanjima.

Slavko Matić rekao je da se često dešava da pojedini sporazumi ili konvencije budu veoma dugo u nadležnim institucijama prije nego što se dostave Parlamentu na ratifikaciju i da je Parlament, ako je uopće kriv, najmanje kriv za proteste invalida koji su u toku.

Saliha Đuderija odgovorila je da entiteti rijetko dostavljaju svoja mišljenja o međunarodnim sporazumima i da u drugim zemljama procedura ratifikacije traje i po nekoliko godina.

Azra Alajbegović rekla je da je ovoliki broj invalida u Federaciji BiH uslovljen cijelim nizom faktora. Prvi je zakonodavstvo doneseno u federalnom parlamentu te operacionalizacija i primjena tih zakona od strane ministarstava koja su izradila neodgovarajuće podzakonske akte. Zatim ljekarske komisije koje se nikako ne mogu amnestirati za trenutno stanje, a koje rade po Pravilniku o fizičkoj onesposobljenosti, koji također nije urađen kako treba. Na kraju, glavni problem našeg prosječnog čovjeka je njegov mentalni sklop, jer je spreman da uzme sve nezakonito ako može.

Nakon rasprave članovi Komisije su, jednoglasno, dali pozitivno mišljenje Predstavničkom domu u vezi s ratifikacijom ove konvencije.

Slavko Matić na kraju se zahvalio članovima Komisije i zaključio sjednicu.

Sjednica je završena u 12,25 sati.

Zapisnik sačinio:

Miroslav Stanišić, stručni saradnik u Komisiji za vanjske poslove.

Sekretar Komisije

Merdžana Iglica

Predsjedavajući Komisije

Slavko Matić

Kopija: MVP-u BiH